



ZYRA E RREGULLATORIT PËR ENERGJI  
REGULATORNI URED ZA ENERGIJU  
ENERGY REGULATORY OFFICE

# RREGULLA PËR MASAT ADMINISTRATIVE DHE GJOBAT

**Prishtinë, 17 qershor 2011**



Bordi i Zyrës së Rregullatorit për Energji, sipas autoritetit të dhënë me Nenin 8 paragrafi 1 nën paragrafi 1.6, nenin 14 paragrafi 2 nën paragrafi 2.18, nenin 25 dhe Nenin 52 të Ligjit për Rregullatorin e Energjisë Nr. 03/L-185, në seancën e mbajtur me datë 17.06. 2011 miratoi:

## **RREGULLËN PËR MASAT ADMINISTRATIVE DHE GJOBAT**

### **KREU I DISPOZITA TË PËRGJITHSHME**

Neni 1

#### **Qëllimi**

Qëllimi i kësaj Rregulle është mbikëqyrja e aktiviteteve të licencuara në sektorin e energjisë si dhe shqiptimi i masave administrative dhe gjobave, në rast të shkeljes së tyre.

Neni 2

#### **Fushëveprimi**

1. Zyra e Rregullatorit për Energji ushtron mbikëqyrje për:
  - 1.1. pajtueshmërinë me kushtet e licencës;
  - 1.2. zbatimin e çmimeve dhe tarifave të aprovuara; dhe
  - 1.3. zbatimin e Rregullave, akteve nënligjore, vendimeve dhe udhëzimeve të nxjerra nga ZRRE.
2. Gjatë kryerjes së aktiviteteve ZRRE mund të:
  - 2.1. kryejë inspektime përmes personave të autorizuar nga ajo;
  - 2.2. njoftojë, autoritetet publike ose organe të pavarura, mbi masat që duhet të ndërmerren brenda kompetencave të tyre;
  - 2.3. suspendon, modifikon apo revokon licencën, si dhe,
  - 2.4. vendosë masa administrative dhe gjoba të detyrueshme.

Neni 3

#### **Përkufizimet**

1. Shprehjet e përdorura në këtë rregull kanë kuptimin si në vijim:
  - 1.1. **“ZRRE”** Zyra e Rregullatorit për Energji;



1.2 **“Informatë konfidenciale”** të dhëna, dokumente apo informacione të tjera, komerciale apo teknike, që kanë të bëjnë me dizajnin, rehabilitimin, sigurinë, veprimin, mirëmbajtjen dhe financimin e veprimeve energjetike apo aktivitete që nuk janë më në domenin publik dhe që shpallja e tyre mund t’i vë në rrezik interesat komerciale të aplikuesve apo të të licencuarve;

1.3 **“Person”** person fizik ose juridik.

2. Shprehjet e përdorura në këtë Rregull, kanë kuptimin e shprehjeve të përdorura në Ligjin për Rregullatorin e Energjisë, Ligjin për Energjinë, Ligjin për Energjinë Elektrike, Ligjin për gazin natyror Ligjin për Ngrohjen Qendrore, Rregullën për Licencimin e Aktiviteteve të Energjisë në Kosovë.

## **KREU II MBIKËQYRJA**

Neni 4

### **Mbikëqyrja nga ZRRE**

1. Bazuar në Nenin 49 të Ligjit për Rregullatorin e Energjisë dhe Rregullës për Licencimin e Aktiviteteve të Energjisë në Kosovë, ZRRE do të mbikëqyrë aktivitetet e ushtruara nga të licencuarit për pajtueshmërinë me kushtet e licencave.
2. Personi i autorizuar nga Bordi i ZRRE-së, do të jetë përgjegjës për mbikëqyrjen e aktiviteteve të licencuara në sektorin e energjisë në përputhje me Ligjin për Rregullatorin e Energjisë, Rregullat e nxjerra nga ZRRE dhe ligjet në fuqi.
3. Personi i autorizuar do të përgatisë raport lidhur me mbikëqyrjen e bërë në ndërmarrjen e licencuar, i cili raport do t’i paraqitet Bordit të ZRRE-së.
4. Personi i autorizuar gjatë kryerjes së mbikëqyrjes, sipas nevojës, do të bashkëpunojë me të gjitha autoritetet relevante në Kosovë.
5. Bazuar në Nenin 50 të Ligjit për Rregullatorin e Energjisë, gjatë përmbushjes së mbikëqyrjes, ZRRE mund të kryejë inspektime të pajisjeve në objekte të të Licencuarit (vizita periodike me paralajmërim apo pa paralajmërim) apo të njoftojë institucionet tjera, autoritete publike ose organe të pavarura, mbi masat që duhet të ndërmerren brenda kompetencave të tyre.

Neni 5

### **Detyrimet e të Licencuarit**

1. I Licencuari do të marrë të gjitha masat e duhura që të ndihmojë ZRRE-në në aktivitetet e tyre mbikëqyrëse, dhe do të sigurojë çdo të dhënë dhe informacion të kërkuar brenda periudhës së përcaktuar në licencë, Doracakun e Raportimit, në ndonjë Urdhëresë apo Udhëzim për të licencuarin, të lëshuar nga ZRRE.



2. I Licencuari duhet të informojë ZRRE-në, sa më shpejtë që të jetë e mundur, për çdo pengesë ligjore, teknike ose administrative që mund të parandalojë përmbushjen e kushteve të licencës, përpara se të ndodhë mbikëqyrja ose inspektimi që do të kryhet nga ana e personit të autorizuar.
3. I Licencuari duhet të respektojë çdo afat dhe udhëzim të dhënë nga ZRRE-ja në lidhje me pajtueshmërinë me kushtet e licencës.

### **KREU III**

#### **MASAT ADMINISTRATIVE DHE GJOBAT**

##### Neni 6

##### **Parimet për vendosjen e masave administrative dhe gjobave**

1. Nëse i Licencuari kryen aktivitete të cilat janë të dënueshme sipas Nenit 52 të Ligjit për Rregullatorin e Energjisë, ZRRE do të vlerësojë dhe do të vendosë mbi vënien e gjobave në një mënyrë të shpejtë dhe të drejtë, në përputhje me dispozitat e kësaj Rregulle.
2. I Licencuari që kryen disa shkelje, mund të ndëshkohet për secilën shkelje.
3. Forma dhe lartësia e gjobës do të bazohet në llojin dhe peshën e shkeljes.

##### Neni 7

##### **Faktorët lehtësues**

1. Faktorët vijues që konsiderohen si lehtësues janë:
  - 1.1. i Licencuari është përpjekur të parandalojë ose të pakësojë dëmin e shkaktuar nga shkelja, ose ka paguar kompensim për dëmin e shkaktuar;
  - 1.2. shkalla e dëmit që i është bërë shoqërisë;
  - 1.3. sjellja paraprake e personit;
  - 1.4. gjendja financiare e personit; si dhe
  - 1.5. shkelja ka qenë aksidentale.
2. Nëse shkelja përfshin një faktor lehtësues siç përcaktohet në paragrafin 1 të këtij Neni, gjoba do të zbritet deri në 50% të vlerës së përcaktuar sipas Nenit 11 të kësaj rregulle. Në rast se ka dy ose më shumë faktorë lehtësues, do të aplikohet zbritja e dy të tretave (2/3) të gjobës ose mund të lirohet nga gjobitja. ZRRE do të arsyetojë çdo vendim që merr.



## Neni 8

### **Njoftimi për Mos-pajtueshmëri**

1. Nëse personi i autorizuar nga ZRRE përcakton se i Licencuari nuk vepron në pajtim me ligjet në fuqi, dhe kushtet e licencës, ose me ndonjë vendim apo akt tjetër të nxjerrë nga ZRRE, ai do t'i japë të Licencuarit një Njoftim me shkrim për mos-pajtueshmërinë.
2. Ky Njoftim për mos-pajtueshmërinë do të:
  - 2.1. përcaktoj natyrën e dështimit;
  - 2.2. i japë të Licencuarit një periudhë kohore të arsyeshme për të kryer disa veprime ose për të ndërprerë veprimet që shkaktuan nxjerrjen e njoftimit. Kjo periudhë nuk do të jetë më e shkurtër se tridhjetë (30) ditë, përveç nëse dështimi kërcënon ose mund të krijojë situata me të vërtetë të rrezikshme;
  - 2.3. identifikojë ato masa që duhet të marrë i Licencuari për të korrigjuar shkeljet që mund të përfshijnë pagimin e një kompensimi të arsyeshëm nga ana e të Licencuarit ndaj palës së prekur, ose edhe masa të tjera që mund të ndërmerren dhe që nuk kërkojnë përpjekje të mëdha brenda një periudhe më të shkurtër kohore; si dhe
  - 2.4. përmbajë udhëzime mbi të drejtën e të Licencuarit për t'u përgjigjur me shkrim.
3. I Licencuari do të përgjigjet ndaj Njoftimit për mos-pajtueshmëri Brenda katërmbëdhjetë (14) ditësh kalendarike pas marrjes së njoftimit.

## Neni 9

### **Masat Administrative**

1. Nëse i Licencuari dështon në përmbushjen e kërkesave pas afatit të paraqitur në Nenin 8 paragrafi 2 nën paragrafi 2.2 të kësaj rregulle, ZRRE mund të vendosë masat administrative ose gjokat të parapara në këtë Rregull, përfshirë përfundimin ose tërheqjen e licencës.
2. Nëse ZRRE përcakton se i Licencuari ka shkelur kushtet dhe obligimet e licencës, mund të:
  - 2.1. kërkojë që i Licencuari përkohësisht të ndërpresë kryerjen e aktiviteteve që shkaktojnë shkeljen e licencës;
  - 2.2. deklarojë të pavlefshëm çdo akt ose vendim që përbënë shkeljen, ta anulojë dhe ta shfuqizojë atë; dhe
  - 2.3. kërkojë që i Licencuari të kryejë të gjithë veprimet e arsyeshme që konsiderohen si të nevojshme për të siguruar eliminimin ose ndryshimin e efekteve negative, dhe se kjo shkelje nuk do të përsëritet më.



## Neni 10

### Shkeljet ndaj Palës së Tretë

1. Nëse I Licencuari ka bërë shkelje të kushteve të Licencës dhe ajo shkelje shkakton apo kanos të shkaktoj dëm material, përfshirë humbjen e përfitimit, apo ndonjë dëm tjetër palës së tretë, pala e dëmtuar ka të drejtë të bëjë ankesë në ZRRE, në, përputhje me Rregullën për Procedurat e Zgjidhjes së Kontesteve në Sektorin e Energjisë.
2. E drejta e palës së dëmtuar nuk përjashton përgjegjësitë civile apo penale të kryesit të shkeljes të përcaktuar me legjislacionin në fuqi në Kosovë.

## Neni 11

### Gjobat

1. Bazuar në Nenin 52 të Ligjit për Rregullatorin e Energjisë gjoba do të vendosen për secilin person, që bën shkeljet si në vijim:
  - 1.1. nuk jep informata të kërkuara sipas nenit 12 të Ligjit për Rregullatorin e Energjisë;
  - 1.2. zbulon informata konfidenciale në mënyrë të papranueshme;
  - 1.3. nuk siguron ndihmën e kërkuar sipas Nenit 13 të Ligjit për Rregullatorin e Energjisë;
  - 1.4. mban llogaritë e tij në kundërshtim me dispozitat e Nenit 46 të Ligjit për Rregullatorin e Energjisë dhe licencës së tij;
  - 1.5. kyçet në rrjet pa respektuar kushtet përkatëse;
  - 1.6. refuzon të lejojë që ZRRE të ketë qasje në llogaritë e të licencuarit;
  - 1.7. punëson persona që nuk kanë kualifikimet e kërkuara sipas ligjit për rregullatorin e energjisë,;
  - 1.8. vendos tarifa që janë subjekt rregullimi pa miratimin e ZRRE-së.
  - 1.9. nuk vepron në pajtim me masat e imponuara sipas Nenit 15 të Ligjit për Rregullatorin e Energjisë për të parandaluar keqpërdorimin me pozitën dominuese;
  - 1.10. kryen veprime që janë në kundërshtim me rregullat teknike ose komerciale, standardet ose kodet teknike;
  - 1.11. pa pasur licencë merret me aktivitete energjetike, për të cilat nevojitet licenca,
  - 1.12. kryen veprime në kundërshtim Rregullën për Licencimin e Aktiviteteve të Energjisë në Kosovë ose me kushtet nga licenca e tij;
  - 1.13. refuzon të lidhë kontratë për furnizim me energji ose të sigurojë qasje në sisteme pa ndonjë arsye të qenë;



- 1.14. ndërton stabilimente në kundërshtim me Nenin 38 dhe 39 të Ligjit për Rregullatorin e Energjisë.
2. Për Shkeljet e përcaktuara nga paragrafi 1 nën-paragrafi 1.1 deri në 1.7 të këtij Neni të licencuarit do t'i shqiptohet gjoba prej dymijë (2,000.<sup>00</sup> €) euro deri në dhjetëmijë (10,000.<sup>00</sup> €) euro.
  3. Për Shkeljet e përcaktuara nga paragrafi 1 nën-paragrafi 1.8 deri në 1.14 të këtij Neni të licencuarit do t'i shqiptohet gjoba prej pesëmijë (5,000.<sup>00</sup> €) euro deri në pesëdhjetëmijë (50,000.<sup>00</sup> €) euro.
  4. Gjoba prej minimumi një e treta (1/3) e pagës neto të pagës së fundit mujore dhe maksimumi deri trefishin (x 3) e pagës neto të pagës së fundit mujore do t'i shqiptohet personit përgjegjës të ndërmarrjes së licencuar i cili bënë shkeljet sipas paragrafit 1 të këtij Neni.
  5. Niveli i gjobës që do të shqiptohet sipas paragrafit 2, 3 dhe 4 të këtij Neni do të varet nga faktorët si në vijim:
    - 5.1. vlera materiale e dëmit të shkaktuar;
    - 5.2. numri i konsumatorëve të prekur;
    - 5.3. përfitimet financiare nga ngarkimet e konsumatorëve dhe veprimet e paligjshme të ndërmarra; dhe
    - 5.4. ndikimi i shkeljes në funksionimin e tregut të energjisë;
  6. Në rast të shkeljes së përsëritur, gjoba e vendosur mund të jetë tri (3) herë më e madhe se shuma e cekur në paragrafin 2, 3, dhe 4 të këtij Neni.
  7. Vendimi i ZRRE-së për shqiptimin e ndonjë gjobe sipas kësaj Rregulle, në asnjë mënyrë nuk kufizon të drejtën e saj për të pezulluar/anuluar licencën.
  8. Vendimi për shqiptimin e gjobës apo masës administrative nxjerrë nga ZRRE mund të kontestohet në Gjykatën kompetente.
  9. Ankesa kundër vendimit të ZRRE-së për gjobë apo masë administrative nuk do ta shtyjë ekzekutimin e vendimit.
  10. Nëse gjoba e shqiptuar nga ZRRE nuk paguhet brenda afatit të përcaktuar ligjor, ZRRE do të filloj procedurën gjyqësore për pagesën e gjobës si borxh civil.
  11. Gjoba e shqiptuar ndaj të licencuarit nuk eliminon përgjegjësinë e tij penale sipas Kodit Penal të Kosovës.
  12. Gjobat do të paguhen në Buxhetin e Republikës së Kosovës.



## **KREU IV NDËRPRERJA APO PEZULLIMI I LICENCËS**

### Neni 12

#### **Ndërprerja apo pezullimi i Licencës**

1. ZRRE do të të marrë të gjithë hapat e nevojshëm, përfshirë vendosjen e gjobave, nëse këto të fundit ose masat tjera mund të eliminojnë arsyet për përfundimin ose tërheqjen e licencës dhe parandalojnë ndërmarrjen e këtyre masave. Ndërprerja apo pezullimi duhet përdorur si hapi i fundit, nëse të gjitha masat e tjera të përcaktuara në këtë Rregull nuk kanë arritur të japin efektin e dëshiruar.
2. Duke iu referuar Njoftimit për mos pajtueshmëri të përcaktuar në Nenin 8, kjo Rregull përcakton kriteret minimale, ndërsa ZRRE mund të nxjerrë njoftim shtesë për të shtyrë periudhën e kohës së përcaktuar në Nenin 8 paragrafi 2 nënparagrafi 2.2 të kësaj rregulle, që i Licencuari të veproj në pajtueshmëri me kushtet e licencës.
3. Nëse dështimi i të Licencuarit vazhdon për më shumë se tridhjetë (30) ditë nga nxjerrja e Njoftimit për mos pajtueshmëri ose njoftimit shtesë sipas paragrafit 2 të këtij Neni, dhe pas propozimit nga personi i autorizuar, ZRRE do të njoftojë të Licencuarin në lidhje me ndërprerjen apo pezullimin e licencës. Ky njoftim do të përmbajë datën kur licenca do të ndërpritet apo pezullohet.
4. ZRRE mund të ndërpresë apo pezullojë licencën në përputhje me Rregullën për Licencimin e Aktiviteteve të Energjisë në Kosovë.
5. Ndërprerja apo pezullimi i licencës do të hyjë në fuqi pas nxjerrjes së Vendimit me shkrim nga Bordi i ZRRE-së.
6. Në rast se ZRRE ka nxjerrë një Vendim që i referohet paragrafit 5 të këtij Neni, atëherë ajo do të emërojë një të licencuar tjetër për të mbrojtur sigurinë e furnizimit dhe për të vënë në funksion asetet që i përkasin të licencuarit të cilit i është tërhequr licenca.
7. Vendimi për ndërprerje apo pezullim të licencës nxjerrë nga ZRRE mund të kontestohet në Gjykatën kompetente.

## **KREU V DISPOZITAT KALIMTARE DHE PËRFUNDIMTARE**

### Neni 13

#### **Gjuha zyrtare**

Kjo Rregull është nxjerrë në gjuhën shqipe dhe do të përkthehet në gjuhën serbe dhe angleze. Në rast të mospërputhjes midis versioneve, do të mbizotërojë versioni në gjuhën shqipe.



Neni 14  
**Ndryshimi**

1. ZRRE mban të drejtën që të ndryshoj ose modifikoj çdo dispozitë të kësaj rregulle.
2. Procedurat për ndryshim ose modifikim të kësaj Rregulle, do të jenë të njëjta si për miratimin e saj.

Neni 15  
**Interpretimi**

Në rast se ka paqartësi për dispozitat e kësaj Rregulle, Bordi do të nxjerrë informacione shpjeguese.

Neni 16  
**Shfuqizimi**

Kjo rregull shfuqizon Rregullën për masat administrative dhe gjobat, nxjerr në bazë të Ligjit për Rregullatorin e Energjisë Nr. 2004/9 dhe të miratuar nga Bordi i ZRRE-së me datë 04 nëntor 2008.

Neni 17  
**Hyrja në fuqi**

Rregulla hyn në fuqi në ditën e aprovimit nga Bordi i ZRRE-së, dhe do të publikohet në faqen zyrtare elektronike të ZRRE-së.

**Bordi i ZRRE-së**

---

Dr. Ali Hamiti, Kryesues

---

Përparim Kabashi, Anëtar

---

Blerim Koci, Anëtar